

# **Lita Paulalu Walkatjura Iyantja Ngura Kalatjilakutu Colossians Nyangatja Ngañmanytju Nyakula Wangkanytjaku**

Nyangatja Godaku tjukurpa Paulalu walkatjunkunytja tjaila unnungurū anangu Jesuku walytja tjutaku tawunu ini Kalatjila nyinanytja tjutaku. Panya Kalatjinya ngura tjukutjuku manta ini Aitjala ngururpa ngarangi ngura panya Ipitjala kakarara. Ka Paulanya ngurpa Kalatjiku, panya paluru ankunytja wiyatū ngañmanypa. Paluru Ipitjalakutu kutju anu Jesuku tjukurpa wangkanytjikitja. Ka tjinguru kutjupa tjukurpa kulintjatjanu ngura nyara palulanguru anu Kalatjilakutu munu Jesuku tjukurpa anangu tjutangka tjakultjunangi tjana kulu kulira Jesuku walytjaringkunytjaku. Ka Paulalu kulinu Kalatjila nyinanytja tjuta Jesuku walytjaringkunytja, munu paluru tjanampa rawangku Godala tjapiningi. Ka ngula Paulaku malpangku ini Paparatjalu palula tjakultjunu tjukurpa tjuta Kalatjilanguru, tjukurpa kutjupa tjuta palya, ka kutjupa tjuta palya wiya. Ka paluru kulira lita nyangatja walkatjunu tjanampa pukularira tjananya wangkara kuñpuntjikitjangku. Munu paluru unkul'iyanu wati ini Titjikatjanya katira

tjananya ungzunyntjaku.

Panya ngura nyara Kalatjila kunyu aŋangu ngunti wangkapai mankurpa nyinangi Jesuku walytja tjutangka tjungu. Munuya kunyu paluru tjana wangkangi nyanga alatji, “Nyura Godala mulapa tjunguringkunyntjikitja mukuringkulampa uti nyura tjukurpa milmilpa tjuṭa pulkara kulinma munu mulamulangku waŋanma. Munu nyura uti tjukurpa irititja tjuṭa kuļu wanganarangku kuliřa palyanma wantintytja wiyangku.” Alatjiya kunyu ngunti wangkara wituwituningi Jesuku walytja tjuṭa.

Ka Paulalu nyangatja kulinu Paparatjalu tjakultjunkunyangka munu lita nyangatja walkatjura iyanu Jesuku walytja tjuṭa ngulutjunkunyntjikitjangku, tjana ngunti wangkapai tjutangka kulilwiyangku wantintytjaku Godalanguru paturingkunyntjakutawara. Munu paluru tjananya wangkangi Jesunya kutju kulintjaku panya paluru kutjungku aŋangu tjuṭa wankarunkupai Godala tjunguringkunyntjaku. Uwa, Paulalu wangkangi tjanala Godanya tjukarurungku kulintjaku palumpa katja Jesunya kuļu. Munu paluru tjananya wituwituningi tjukaruru palyanyku nyinanyntjaku Godaku walytja mulapa.

### **Tjukurpa nyanganpa ngarinyi:**

1:1-2 Paulalu nganmanytju wangkanytja

1:3-14 Paulalu tjanampa Godala tjapintja

1:15—2:5 Christanya tjukarurungku kulintjaku

2:6-23 Paulalu tjananya ngulutjunkunyntja ngunti wangkapai tjutangka-tawara

**3:1—4:6 Yaaltji-yaaltji Godalawanu tjukaruru  
wirura nyinanytjaku**  
**4:7-18 Paulalu tjukurpa ma<sub>l</sub>atja wangkanytja  
munu malpa tjutaku tjukurpa iyantja**

***Paulalu Nganmanytju Wangkanytja***

**1-2** Uwa, Jesuku walytja tjuta! Ngayuluna Paulalu lita nyangatja nyurampa walkatjunanyi ngura pala Kalatjila nyinanytja tjutaku. Panya Godaluni ngurkanta<sub>ra</sub> tjunu Jesuku Christaku tjukurtjara war<sub>k</sub>arininytjaku mununi witura iyanu palumpa tjukurpa aŋangu tjutangka tjakultjunkunytyaku. Katju malpa ngayula tjungu nyinanyi kuvari Timitjinya nyuntumpa nganampa panya walytja Jesulanguru. Munuli nyanga paluru ngali tjunguringkula lita nyangatja nyuralakutu ma-iyani, Godaku walytja tjutakutu. Nyura panya ngalimpa walytja Christalanguru munu palula tjungu nyinara palunya mulamulangku waŋani.

Ka Mama Godalu nyuranya pukultju pu<sub>l</sub>kangku kanyinma munu nyuranya kurunpa rapara puku<sub>l</sub>manama.

***Paulalu Tjanampa Godala Tjapintja***

**3-4** Panya Timitjilu ngali nyurampa Godala tjapilpai, Mayatja Jesuku Christaku Mamangka, munuli tjapi<sub>ra</sub> nyuralanguru palunya rawangku walkulpai panya ngali kulinu nyura Jesuku pu<sub>l</sub>kara mulamularingkunyta, munu Godaku walytja uwankaraku pu<sub>l</sub>kara mukuringkunyta. Nyara palulanguruli nyurampa pukularira Godanya walkulpai. **5** Panya nganmanytjulpi

nyura kulinu tjukurpa wiru nyurala tjakultjunkunyangka, tjukurpa panya mulapa Jesunyatjara. Nyura panya nganmanytju kulinu Godalu nyuranya ngura ilkaritjangka wirkakatinytjikitjangku kalkunnyangka. Munu kalkuntja nyanga palunya kulira nyura raparingu munu panya pala palulanguru nyura rawa Jesuku mulamularingangi munu panya nyura Godaku walytja tjuṭaku kulu pulkara mukuringkupai.

<sup>6</sup> Palu tjukurpa wiru nyanga palunyaya ngura winkingka wangkara lipintanangi, kaya kulira mulamularingangi anangu winkingku, munuya mulamularingkula ma-tjukarururingangi. Ka nyura kulu palu purunyaringu tjukurpa wiru kulira, panya nyura mulapa nintiringu Godanya nyurampa ngaltunytju pukultju nyinanytja kulira. <sup>7</sup> Tjukurpa nyangatja wati panya Paparatjalu nyurala tjakultjunu watarku nyinanyangka. Paluru ngalimpa malpa wiru panya paluru nganana Christaku warika wanganarangku kulira palyalpai. Munu ngali palunya nyuralakutu iyannyangka paluru nyurala tjukaruru warikaringi nyura Godaku walytjaringkunytjaku. <sup>8</sup> Nyara paluru ngalila tjakultjunangi nyura Godaku walytja tjuṭaku wangañara mukuringkunytja Kurunpa Milmiltu nyuranya mukulyankunyangka.

<sup>9</sup> Kali nyangatja kulintjatjanungku nyurampa rawangku Godala tjapilpai wantinytja wiyangku. Ngali tjapilpai Kurunpa Milmiltu nyurala rawangku nintintjaku nyura tjukarurungku kulintjaku uwankara Godalu

panya wangkanytjita. <sup>10</sup> Alatjili tjapilpai nyura nintiringkula Mayatja Godalawanu tjukaruru nyinanytjaku, paluru nyakula pukularinytjaku. Panya ngali mukuringanyi nyura rawangkutu tjukarurungku palyantjaku mukulyangku, munuli piruku mukuringanyi nyura Godaku rawa nintiringkunytjaku. Uwa, rawangkuli Godala tjapilpai paluru nyuranya alatji palyantjaku. <sup>11</sup> Godanya panya witulya pitalytji pulkanya nyinanyi, kali palula nyurampa tjapilpai nyuranya pulkara witulyankunytjaku nyura kurunpa raparingkula palunya rawangku kulilkatinytjaku wantintyja wiyangku. Munuli piruku nyurampa tjapilpai kutjupangku nyuranya kurannyangka munta tjinguru anannyangka nyura kulira kuraringkuwiya pukulpa nyinanytjaku Godaku witulyatjara. <sup>12</sup> Munuli nyurampa tjapilpai nyura Mama Godanya pukultu walkura wirunmankunytjaku panya paluru nyuranya kuranguru wankarunu nyura ngura ilkaritjangka wirkara pitalytji pulkangka nyinanytjaku. Panya paluru kalkunu palumpa walytja uwankara palula tjunguringkula wanka titutjara nyinanytjaku.

<sup>13</sup> Panya Satantu aŋangu tjuta mungawalurungka katirinkupai iwara kurangka. Kalanya Godalu iwara kuranguru mantjira palumpa katjangka tjungunu paluru nganaŋanya iwara palyangka katirinkunytjaku. Katja nyara palumpa panya Godanya pulkara mukuringkupai. <sup>14</sup> Munu pala palulawanungku panya Godalu nganaŋanya Satantanguru wankarunu Jesunya nganampa kuranguru

ngalkilpa      anga-ilunyangka,      munulanya  
 pala palulanguru Godalu nganañanya kura  
 palyantjitjanguru kalypangku pungkuwiyangku  
 wantinyi.

*Christanya Pulka Mulapa Uwankarangka  
 Waintarinytja*

<sup>15</sup> Godanya panya arkayi nyinanyi. Nganaña palunya nyakunytja wiya, palu nganaña palumpa katja Jesulanguru kutju Godanya kulini. Panya Jesunya pulka mulapa nyinanyi Godalu paluntjtja uwankarangka waintarira.

<sup>16</sup> Panya palulawanungku Godalu uwankara mulapa palura tjunu mantatja tjuta, ilkaritja tjuta kułukulu, panya uti ngaranytjtja tjuta munu arkayitja tjuta kułu, angelpa tjuta, munu mayatja ilkaritja kutjupa kutjupa tjuta kułu paluru Jesulawanungku tjunu. Nyara palulanguru Jesunya pulka mulapa nyinanyi uwankarangka waintarinytja. Ka panya uwankara Godalu palyantja ngaranyi Jesuku palumpa kutjuku alatjtju. <sup>17</sup> Nyara paluru panya kuwaripatjara mulapa uwankara wiyangka nyinangi Jesunya, munu palulanguru mantatja ilkaritja uwankara palyantjtjanungku paluru rawangkutu kanyiningi palyantja uwankara, munu kuwari kułu uwankara kanyini tjungu ngaranytjaku.

<sup>18</sup> Uwa, Jesunya panya mayatja katutja pulka mulapa nyinanyi, panya paluru Godaku walytja uwankara kanyini mayatja pulkangku. Paluru nganañanya kurunpa wankaru kanyilpai palumpa walytjapiti, panya paluru-warara

ilunytjatjanu wankaringu mayatja pułka mulapa nyinanytjikitja uwankarangka waintarinytja.

<sup>19</sup> Panya Godalu kulinu palumpa katja palunya puruny pa alatjitu nyinanytjaku, kala palulanguru Godanya uti kulini Christalanguru, panya paluru Godanya alatjitu. <sup>20</sup> Godalu panya nganananya palumpa katjangka tjungunu, paluru nganananya mayatjangku kanyintjaku. Paluru alatjinganu panya paluru mukuringangi palumpa katjawanungku mantatja ilkaritja uwankara wiruntjikitjangku. Paluru mukuringangi uwankara palula piruku tjunguringkunytjaku, munu palulanguru palumpa katja mantakutu iyanu puṇu kaṭakutjarangka ilura milkali tjutinytjaku anangu tjutaku ngalkilpa.

<sup>21</sup> Ka panya nyura ngañmanyapa Godalanguru watarku mañtalpa nyinangi, panya nyura palumpa kuraringkula kura tjuṭa palyaningi.

<sup>22</sup> Palu kuwari palumpa katja puntu winki ilunytjitunguru Godalu nyuranya ngalkinu palula kalypa nyinanytjaku, nyura palulakutu palya mulapa wirkankunytjaku kura wiya alatjitu. <sup>23</sup> Palu nyuranya wantikatinytjaku-tawara tjukurpa wiruku rawa mulamularingama wantinytja wiya. Munuya Jesunya kutju tiṭutjarangku wañanma wantinytja wiyangku. Munu panya Godalu nyuranya ngura ilkaritjangka wirkakatinytjikitjangku kalkunnyangkaya rawangku kulira raparingama palumpa.

Kalkuntja nyanga palumpa panya nyura ngañmanytu kulira mulamularingu tjukurpa

wiru Jesuku nyurala tjakultjunkunyangka. Tjukurpa nyanga palunya panyaya manta winkingka ankula tjakultjunangi aŋangu uwankarangka. Kaña ngayulu kuļu tjukurpa nyanga palunya wangkapai nyinanyi.

*Godalu Paulanya Wituntja Tjukurpa Parawangkanytjaku*

<sup>24</sup> Ka Jesunya wantipai tjutangku ngayunya ngukalpai ngayulu tjukurpa Jesunyatjara aŋangu tjutangka para-wangkanyangka. Palu ngayuluŋatju pukulpa alatjiču nyinanyi, panya ngayulanguru aŋangu tjuṭa mulapa Jesuku mulamularingu. Kaňiya Jesunya wantipai tjutangku ngayunya kuranmananyi, munuṇiya atuni munu punganyi munu tjailelangka tjarpatjunanyi. Palu ngayulu nyanga pikawanu pukulpa nyinanyi Godaku walytja tjutaringkunytjaku, panya Jesulu alatji wangkangu, “Panya ngayunya puřunypaṭuya kutjupa tjutangku nyuranya pikantankuku ngayuku war̄ka palyannyangka.” <sup>25</sup> Ka ngayulu Jesuku walytja tjutangka tjakultjunkupai panya Godaluṇi war̄ka nyangatja ungu tjukurpa palumpa winki nyurala utiṛa wangkanytjaku. <sup>26</sup> Panya tjukurpa nyanga palunya Godalu iritinguru rawangku kumpilpa kanyiningi. Palu kuwari nyanga paluru utiṛa nintinu palumpa walytja tjutangka. <sup>27</sup> Paluru mukuringangi tjana uti kulintjaku tjukurpa nyanga kumpilitja. Tjukurpa nyanga paluru panya Jew tjuṭaku kutju wiya, palu aŋangu ngura uwankaranguru

kulira pukularinytjaku panya Godalu tjananya kulu wankarunkunytjaku ngaranyi.

Tjukurpa paluru alatji wangkanyi,

“Christanya panya nyurala nyinanyi, ka pala palulanguru nyura kurunpa rapangku patani Christalu nyuranya ngula Godaku ngurangka wirkakatinytjaku pitalytji pulkangka.”

<sup>28</sup> Palulangurula anangu uwankarangka tjukurpa Christanyatjara para-wangkanyi. Nganana tjananya purkarangku nintilpai Godaku tjukurpa uti kulintjaku munula tjananya markulpai iwara palyangka kutju ankunytjaku. Panya nganana mukuringanyi Christaku walytja uwankara Godala tjukarurungku wirkakatinytjikitja tjana palula mirangka palya mulapa ngaranytjaku. <sup>29</sup> Nyanga palunyakitjana Jesuku walytja tjutangka rawa pulkara warkarinyi pakuringkuwiya, Jesulu ngayunya witulyangku kunpunnyangka.

## 2

<sup>1</sup> Ka panya nyura munu Layata-tjiyanya ngurara tjutangku kulu ngayunya nyakunytja wiya. Ka palu purunypa ngura kutjupitja tjutangku kulu ngayunya nyakunytja wiyatu. Palu ngayulu palunya tjananya munu nyuranya kulu pulkara alpamilantjikitja mukuringanyi nyura uwankara Godanya tjukarurungku wantanjaku mununa rawangku nyurampa Mamala tjapilpai. <sup>2</sup> Panya ngayulu mukuringanyi nyuranku tjungu mukulya nyinanytjaku panya nyanga alatji nyinara nyura kurunpa raparingkuku. Mununa mukuringanyi

nyura tjukurpa Christanyatjara kulira pulkara nintiringkula uti kulintjaku. Tjukurpa nyangatja panya Godalu kumpilpa kanyiningi palu kuwari nyanga paluru utinu katja palumpa iyara.  
<sup>3</sup> Panya Christalu kutjungku tjukurpa kumpilpa ngaranytja uwankara utira nintilpai. Ka nyura Christanya kutju kulirampa ninti mularariku Godaku tjukurpa uwankaraku.

<sup>4</sup> Ka kutjupa tjutangku tjinguru nyuranya ngunti kuralku wiru-palku wangkara, kana nyurala tjukurpa nyangatja wangkanyi nyura tjukarurungku kulira tjanala kulilwiyangku wantintytjaku panya ngunti wangkapai tjutangka. <sup>5</sup> Panya ngayulu nyuranya rawangku kulini nyura ngunti kulintjaku-tawara. Ngayulu patu nyinanyi nyuralanguru palu nyuranya kulinnyangka ngayuku kurunpa nyurala tjungu nyinanyi. Munu ngayulu nyurampa pulkara pukularinyi panya nyura tjungu ngarala Jesuku Christaku titutjara mulamularingkunya.

### *Christala Titutjara Tjungu Nyinanytjaku*

<sup>6-7</sup> Uwa, nyura panya tjukurpa wiru kulira Jesuku Christaku mulamularingu nganampa Mayatjaku. Palulanguruya tjukurpa pala palulawanu Jesula tjungu nyinama maunthalparingkunytja wiya. Titutjarangkuya Jesuku tjukurpa wanganarangku kulinma wantintytja wiyangku, munuya tjukaruru palulawanu kutju rapa mulapa nyinama tjukurpa ngunti kulintja wiya. Munuya Godaku pulkara pukularira palunya

rawangku walkunma panya nyuranya wirura kanyinnyangka.

<sup>8</sup> Kulilaya! Tjinguru nyuranya aŋangu kutjupa tjutangku wituwitulku Godaku iwara wantima tjananya waŋantjaku. Palu kuliraya wantima tjananya waŋantja wiyangku, panya paluru tjana ninti pulkangku-palku tjukurpa wirupalku wangkapai. Palu palumpa tjanampa tjukurpa ngunti alatjitu ngaranyi tjukaruru wiya, panya tjana aŋanguku tjukurpa tjuṭa kulilpai irititja tjuṭa, munuya tjukurpa mantatja tjuṭa kutju kulintjatjanungku wangkapai. Palu tjukurpa nyanga paluru tjana kura Christalan-guru wiya.

<sup>9</sup> Ka nyura tjananya kulilwiyangku wantima, panya tjana Christanya ngunti-palku kulilpai. Palu Christanya panya Godanya alatjiitu. Mulapa paluru aŋanguringu nganaŋanya purunypa, palu kurunpa paluru Godanya alatjiitu nyinangi, munu kuwari paluru alatjiitu nyinanyi.

<sup>10</sup> Paluru tjana tjukurpa kutjupa tjuṭa nyuranya nintintjikitja mukuringanyi, palu tjananya kulin-tja wiyangku wantima, panya nyura Christala kutjuringkula palumpa iwarangka ananyi munu palulanguru nyura yaaltji-yaaltji iwara kutjupaku mukuringkuku? Wiya nganaŋa palumpa iwarangka ankula iwara kutjupa tjutaku mukuringkunytja wiyaringu, panya Christaku iwara wiru mulapa kutjupa tjutangka waintara alatjiitu ngaranyi tiṭutjara. Paluru mayatja pułka mulapa nyinanyi mayatja kutjupa uwankarangka waintarira, mayatja arkayitja ilkaritja tjutangka munu mantatja tjuṭangka kuļu waintarira ny-

inanyi. Nyara paluru nyurala tjungu nyinanyi. Kaya palulanguru ngunti wangkapai tjuṭa waṇantja wiyangku wantima.

<sup>11</sup> Ngañmanypa panya nyura watarku nyinara kura kutju palyantjikitja mukuringkupai. Palu kuwari nyura Christala tjunguringkunyangka paluru nyuranya kulintja kampa kutjupanu nyura kuraku mukuringkuwiyangku wantintytjaku. Nyangatja Christalu kutjungku nyuranya kampa kutjupanu, panya aŋangu puṭu walytja kampa kutjuparira palyaringkupai. <sup>12</sup> Ka panya nyuranya ḫrungka baptise-katinytja kulinma! Panya ḫrungka unngu tjarpanytja nyara paluru nintini ilunytja, panya Christanya nyurampa anga-ilungu. Munu ḫrunguru ngalya-pakantja nyara paluru nintini wankaringkula pakantja, panya Christanya nyurampa ngalkilpa anga-ilunytjatjanu wankaringkula pakaṇu. Panya Godalu witulya pulkangku Christanya ilunyangka wankaṛa pakaltjingaṇu, munu nyuranya kuļu ara nyanga palunya kulira mulamularingkunyangka palu purunypaṭu wankaṛa pakaltjingaṇu palumpa walytjaringkula iwara tjukarurungka ankunytjaku.

<sup>13</sup> Nyura ngañmanypa miri purunypa nyinangi Godanya kulintja wiyangku wantira, panya nyura kura rawangku palyalkatingi munu nyura puṭu wantingi, munu panya nyura Moseku tjukurku ngurpa nyinangi munu nyura walytjangku kutju kulilpai. Uwa nyura miri purunypa nyinangi kura kutju kulira, palu Godalu nyuranya miri purunypa nyinanyangka nyakula Christalawanungku wankaṛunu

palumpa walytjaringkunytjaku. Godalu panya nganañanya kura uwankara palyantjitjanguru kalypangku pungkuwiyangku wantingu. <sup>14</sup> Panya nganampa kura uwankara nyiringka puruny whole ngaringi nganaña panya palyantja tjuṭa munu Godala tungunpungkunytja uwankara. Ka kura nyanga palula tjanalanguru Godalu nganañanya wiyanjtjaku ngarangi. Palu panya Christanya nganampa ngalkilpa ilungu puṇu kaṭakutjarangka. Ka Godalu puṇungka ngaranyangka nyakula wangkangu, “Nyantja ngayuku katja nyurampa ngalkilpa anga-ilunyi nyura ilunytjaku-tawara. Kana palulanguru nyurampa kura uwankaranguru nyuranya kalypangku wantinyi alatjitu pungkunytjikitjangku kulintja wiyangku.” Alatji paluru wangkara nganampa kura uwankara wiyanu Christanya nganampa ngalkilpa ilunyangka. <sup>15</sup> Munu paluru Christanya ilunytjitetjanguru mayatja mamu kurunitja tjuṭa katu ngaranyangka tjarunu uparingkunytjaku. Paluru tjananya witira itarikatingu tjuṭa miṛangka nyakula kulintjaku, “Mulapa Godalu tjananya upa mulapa palyanu Christalawanungku.”

### *Ngunti Wituwitunyyangka Kulilwiyangku Wantinytjaku*

<sup>16</sup> Kulilaya! Panya kutjupa tjuṭangku nyuranya kuranmankupai kutjupa kutjupa tjuṭa ngalkula tjikinnyangka. Panya tjana nyanga alatji kulipai, “Uila mai, kuka ini nyanganpa ngalkuwiyangku wantima munula tjuratja ini

nyanganpa kulu tjikilwiyangku wantima.” Palu alatjiya ngunti kulilpai munuya ngalkula tjikinnyangka nyakula nyuranya ngunti aŋangura wangkanyi. Palu nyura tjananya kulira wantima.

Munu panya nyuranya inmanguru kulu aŋangura wangkapai. Ka nyura tjananya kulira wantima panya tjana alatji kulilpai ngunti, “Utila inma irititja tjuta kulu palyalkatima panya Godalu Mosela wangkanytjitjangka inma palyantjaku ngarapai kuli kutjupa kuli kutjupa munu nyinnga kutjupa nyinnga kutjupa, kala uti wantintytja wiyangku palyanmatu. Munula uti inma panyatja kulu pira mangarinyangka palyanma, munula panya Saturday titutjarangku inma kanyinma.” Palu nyanga alatjiya ngunti kulilpai munuya inma palunya tjananya wantintyngka nyakula nyuranya aŋangura wangkapai. Palu nyura tjananya kulira wantima panya tjanaya nyuranya ngunti kuramnanyi nintingkupalku. <sup>17</sup> Panya tjana ara nyanga irititja tjuta ngunti pulkantjikitjangku wangkara wituwitulpai tjananya waŋantjaku. Palu ara nyanga paluru tjana aŋangu wiltja purunypa. Panya nganaŋa aŋangu wiltja wirkankunyangka nyakula kulilpai, “Munta, aŋangu pitjanyi.” Munula aŋangu panya paluru wirkankunyangka palula wangkapai wiltjangka wiya. Pala palu purunypala ara irititja tjuta nyakula kulilpai Christanya pitjanytjaku. Palu panya Christanya pitjangu alatjitu, kala uti ara irititja tjuta wantira palunya kutju waintara

kulinma.

<sup>18</sup> Uwa, ngunti wituwitulpai tjutangkaya kulilwiyangku wantima! Panya paluru tjanaya kañany-kañanytju alatji ngunti wangkapai, “Nganañanya purunytyaya Godanya walkunma kurunpa tjaruringkula, munuya angelpa tjuña kuļu walkunma!” Palu alatjiya ngunti wituwitulpai, munuya kulira wantinyangka nyuranya aŋangura wangkapai. Ka uti nyura tjananya kulilwiyangku wantima, panya tjana tjukurmara nyakunytjatjanungku tjukarurungku-palku wangkapai. Tjana kañany-kañanytju wangkapai nintingku-palku, palu tjana walytjangku kulira wangkapai Godalanguřu wiya.

<sup>19</sup> Uwa, nyanga tjananyaya kulira wantima, panya tjana Christala mayatja pulkangka tjungu ngaranytja wiyingru. Panya Godalu Christanya tjunu palumpa walytjapitiku mayatja pulka nyinanytjaku, ka paluru nganañanya uwankara tjungura kanyini kutjuňu wanka nyinanytjaku. Alatji Godalu palyanu nganaña Christala tjungu ngarala kuňpu pułkaringkunytjaku. Panya pulyku munu tarka tjungu ngarapai nganaña paltjura kuňpu ngaranytjaku, pala palu purunypha Godalulanya Christalawanungku kanyini kuňpu.

<sup>20-21</sup> Christanya panya nyurampa kuranguru ngalkilpa anga-ilungu munu nyuranya kampa kutjupanu palunya kutju kulintjaku ařa mantatja tjuña wantira. Palu nyaaku nyura tjukurpa nyanga mantatja tjuña rawangku kulilpai? Munu nyura nyaaku kutjupangku

nyuranya painnyangka mai kutjupatjara ngalkuwiyangku wantipai, munu kutjupa kutjupa tjuṭa pampulwiyangku wantipai? <sup>22</sup> Panya ara nyanganpa aŋangungku kulintja uwankara, kaya mulamularingkuwiyangku wantima. Panya ara nyanga paluru tjana unytju ngaranytjatjanu wiyaringkuku. <sup>23</sup> Kaya aŋangu kutjupa tjuṭangku ara nyanga palunya tjananya kulira angelpa tjuṭa pupakatira wal'kulpai, munuya kunṭanytjupalku nyinapai, munuyanku walytjangku puntu pikantankupai. Palu wiya, ara nyanga palunya tjananya palyaraya puṭu kampa kutjuparira palyaringkupai. Palu aŋangu Christaku mulamularingkula kutju palyaringkupai.

### 3

#### *Godalu Kulintjitja Tjuṭa Titutjarangku Kulintjaku*

<sup>1</sup> Godalu panya Christanya ilunyangka wankara pakaltjinganu munu pala palulanguru nyuranya kuļu kurunpa wankara Christala tjungunu. Kaya palulanguru Godaku ara tjuṭa rawangku kulinma. Panya ngura nyara ilkaritjangka Christanya mayatja pulka nyinanyi Mama Godala tjungu. <sup>2</sup> Kaya Godalu kulintjitja tjuṭa titutjarangku kulinma watarkuriwiyangku, munuya mantatja kurakura tjuṭa kulintja wiyangku wantima. <sup>3</sup> Panya ngañmanypa nyura kura nyinangi watarku alatjiṭu Godanya kulintja wiya, munu panya nyura palulanguru Godanya

kulinu munu kura uwankara wantingu, panya anangu wiyingkupai ka nganaña palumpa watarkuripai, nyara palu purunypa nyura Godaku walytjaringkula kuraku watarkuringu. Munu nyura kuwari kampa kutjuparira Jesula Christala tjungu wanka nyinanyi Godala mirangka. Palu nyangatjaya watarkitja tjutangku puṭu kulini.<sup>4</sup> Uwa nyura Christaku mulamularingkula palula tjungu wanka nyinanyi. Ka paluru ngula małaku pitjala anangu tjutangka mirangka ngaraku, ka nyura kulu palula tjunguringkula ngaraku palya mulapa pitalytji pulkangka.

*Godalulanya Kulintja Wirulpai Palyanyku  
Kulira Nyinanytjaku*

<sup>5</sup> Palu nyura kura kulilwiyangku wantima. Munu anangu kuritjaraku nyakula mukuringkuwiyangku wantima, munu kuri walytjaku kutju mukuringama. Ka nyitayirangku uti kungkawara kutjupangka kutjupangka ngariwiyangku wantima munu kuri walytja altima. Ka kungkawarangku ngapartji uti wati kutjupa kutjupangka ngariwiyangku wantima munu kuri walytjaku kutju paṭara nyinama. Uwa kura kutjupa kutjupa tjuta nyanga palu purunypa uwankaraku mukuringkuwiyangku wantima munu palyaku kutju mukuringama. Munuya manyuringkunytja wiyangku wantima, panya anangu kutjupa kutjupa utitjaku manyuringkula Godalanguru paṭuringanyi munu utitja tjuta kutju titutjarangku wanarinanyi.

<sup>6</sup> Uwa kura nyanga palu purunypa tjuṭaya kulilwiyangku wantima panya aŋangungku kura nyanga purunypa tjuṭa palyara Godala tungunpunganyi, ka Godanya palumpa mirpaŋaripai. <sup>7</sup> Nyura kulu panya nganmanytju Godala tungunpungkula kura nyanga palunya tjananya palyaningi. <sup>8</sup> Palu kuvari nyura kura nyanga uwankara wantintjaku ngaṛanyi. Mapalku waruringkula mirpaŋariwiyangku wantima, munu aŋangu kutjupa ngukara wangkawiyangku wantima, munu aŋangu kutjupa uulira ngunti wangkawiyangku wantima, ngalytjurmara wangkawiyangku wantima, munu warkiwiyangku wiru kutju wangkama, <sup>9-10</sup> munu ngunti-ngunti wangkawiyangku wantima tjukarurungku kutjuya wangkama.

Uwa, alatjingantja wiyangkuya wantima alatjitu, panya nyura kuvari kulintja kampa kutjuparingu munu kuraku mukuringkunyta wiyaringu. Ngañmanytju panya nyura kura nyinara kura kutju palyalpai nyinangi. Palu kuvari nyanga nyura kampa kutjuparingu munu nyura palyanyku kulipairingu, munu panya nyura kura tjuta palyantja wiyaringu. Godalu nyuranya kulintja wiruṇu nyura palyanyku kulira nyinanytjaku, munu paluru rawangkutu nyuranya wirulkatinyi nyura wiru mulararira palunya purunyarintjaku. Ka nyura palumpa ninti mularariku. <sup>11</sup> Nyara palulanguru nyura kulintja wiruringkula Godaku walytja uwankarangka tjunguringkula kutjuṭu nyinanyi mauṇtalpa mauṇtalpa

wiya. Panya Godaku walytja kutjupa tjuta anangu Jew tjuta, ka kutjupatjara Jew wiya tjuta, palu tjana uwankara kutjuringu. Ka kutjupa tjuta wati, ka kutjupa tjuta tjitji, palu kutjuṭuya. Ka kutjupa tjuta ngura kutjupitja, ka kutjupa tjuta putitja waliku ngurpa, kutjupa tjuta mayatjangka war̄karipai, kutjupa tjuta walytja mukuringkula war̄karipai, palu nyanga paluru tjana uwankara kutjuṭu nyinanyi Godaku walytjapiti. Panya Christanya Godaku walytja uwankarangka kutjungka kutjungka tjunguringkula nyinanyi, kala palulanguru kutjuṭu nyinanyi munula palunya kutju kulini uwankarangka waintarintja.

<sup>12</sup> Nyuranya panya Godalu ngurkantanu palumpa walytjaringkunytjaku. Munu paluru nyurampa pulkar̄a mukuringanyi. Palulanguru nyura uti mukulya pulka Christaku walytja mulapa nyinama. Tjinguru nyuralanguru kutjupa ngaltutjara nyinanyangkampa nyura nyakula ngaltunyjtungku atunymara kanyinma wantintja wiyangku. Munuyanku mukulya pukultju nyinama kurunpa tjaruringkula kañany-kañanypa nyinanytja wiya. Palu purkarangkuya wangkama mirpanarintja wiyangku, munuyanku ngapartji-ngapartjingku alpamilanma. <sup>13</sup> Ka kutjupangku nyuranya kurannyangkampa uti nyura mapalku mirpanariwiyangku palunya kalypangku kulira wantima, panya nyura kura palyannyangka Mayatja Jesulu nyuranya kalypangku wantingu, ka palu purunypa uti nyuranku mukulya ngarala kalypangku kulira wantima. <sup>14</sup> Uwa

nyuranku uwankarangku nyangama kurunpa winki mukulya ngarala, panya mukulya wiya ngarala puṭu nyura pukulpa nyinaku. Palu nyuranku mukulya winki ngaralampa kurunpa kutjuṭu nyura tjungu nyinaku.

**15** Christalu panya nyuranya palyarungunu nyuranku kalypa kutjuṭu nyinanytjaku. Palulanguruya kalypa titutjara nyinama piruku kuraringkunytja wiya. Godalu panya nyuranya mukuringkula waltytjanmanu munu paluru mukuringanyi nyura tjungu nyinara pukulpa nyinanytjaku kutjuṭu ngalytjurmarkunytja wiya.

**16** Munuya tjukurpa Jesunya Christanyatjara rawangku kulinma kurunpa winkingku. Munuyanku tjukurpa palunya nintingku kulintjatjanungku ngapartji-ngapartjingku wangkara nintinma, munuyanku tjukarurungku kutju kulintjaku wangkara markunma. Munuya Godaku pulkaṛa pukularira kurunpa winkingku inma tjuta rawangku inkama irititja tjuta munu kuwaritja tjuta, munu psalm tjuta kuļu.

**17** Palu kulilaya! Nyura panya kuwari Mayatja Jesuku waltytja tjuta nyinanyi. Palulanguruya paluru nintinnyangka kutju kulira palyanma waltytjangku kulira palyantja wiyangku. Munuya tjukarurungku kutju wangkama. Munuya Mama Godaku pukularira palunya rawangku walkunma Jesula Christalawanungku.

### ***Titutjara Kalypa Palyanyku Nyinanytjaku***

**18** Minyma tjuta, kungkawara tjuta wanyuya kulinma tjukurpa nyangatja! Utu nyura watu kur-

ingka wangañarangku kulinma nyura Jesuku walytja nyinara.

**19** Kaya wati tjutangku ngapartji kulila! Uti nyura minyma kuriku pulkara mukuringama munu palunya wiruña aṭunymaṛa kanyinma kuraringkula wangkanytja wiyangku.

**20** Kaya tjitji tjutangku ngapartji kulila! Uti nyura Jesuku walytja nyinara mamangka ngunytjungka titutjarangku wangañarangku kulinma wantintyta wiyangku. Panya nyura mamangka ngunytjungka wangañarangku kulinnyangka Godanya nyurampa pulkara pukularinyi.

**21** Kaya mamangku ngunytjungku ngapartji kulila! Utiya nyurampa tjitji tjuta palyanyku kanyinma pauntjingaṛa wangkanytja wiyangku. Tjinguru tjitji nyurampa pulkara nguluringkula tjituru-tjitururiku rawangku painnyangka munu kuraringkuku.

**22** Kaya warkaripai tjutangku ngapartji kulila! Uti nyura mayatja mantatja tjutangka wangañarangku kulinma titutjarangku. Tjinguru mayatjangku nyuranya wangkanyangkaya tjukarurungku palyanma paluru nyakula pukułarinnytjaku. Munu tjinguru paluru warkaku wangkara wantikatinyangka nyura uti palu purunytjutu warka rawangku palyalkatima ankunyangka wantintyta wiyangku. Panya nyura Mayatja Jesuku walytja nyinanyi. Palulanguru nyura uti Jesula wangañarangku kuliṛa mayatja mantatja tjutaku wiruṛa tjukaruru warkarima.

<sup>23</sup> Uwa, warka kutjupa kutjupa uwankara wirura palyanma kurunpa winkingku. Palya nyura anangungka kulira wa̱karima, palu wa̱rka palyara waintara kulinma Mayatja Jesunya munu paluru nyakula pukularintjaku anangu mayatjaku wirura palyanma, panya Jesunya nyurampa mayatja pulka nyinanyi, anangungka waintara. <sup>24</sup> Panyatjaya kulinma, panya Mayatja Jesulu nyuranya kalkunu ngura nyara ilkaritjangka tjukarurungku ungkunytjikitjangku nyura mantangka nyanga palyanyku warkarintjitungka. Panya nyura Mayatja Christaku wa̱karinyi munu nyura mulapa mantjilku kalkuntja panyatja. Palunyakitjaya kurunpa winki wangañara wa̱karima mayatja panya mantatjangka. <sup>25</sup> Palu anangungku rawangku kura palyalkatinyangka Godalu nyakula ngurkantankuku munu palunya tjituru-tjituru palyalku. Panya Godalu nintingku tjukarurungku kutju ngurkantankupai ngunti-ngunti palyanmankupai wiya.

## 4

<sup>1</sup> Kaya mayatja tjutangku ngapartji kulila! Nyura uti nyurampa warkaripai tjuta palyanyku kanyinma kuralwiyangku, panya nyura ngapartji nyurampa Mayatja Ilkaritjanya kulintjaku ngaranyi.

### *Godala Titutjarangku Tjapintjaku*

<sup>2</sup> Kaña kuwari nyurala uwankarangkalta nyangatja piruku wangkanyi. Utu nyura Godala tjapinma titutjarangku pakuringkuwiyangku.

Tjanyaltuya tjapinma, munuya Godaku pukularira wangkama palula, "Wirungkuñin kanyini!"<sup>3-4</sup> Munuya ngayuku kulu Godala tjapinma, panya ngayulu mukuringanyi anangu tjuṭangka tjukurpa kumpilitja Jesunya Christanyatjara utira wangkanytjikitja. Nyanga palulanguruṇiya tjailangka tjarpatjunu, tjukurpa Jesunyatjara wangkanyangka. Palu nyura anangu tjuṭaku kulu tjapinma tjana kulu wangaṇararingkula kulintjaku tjukurpa nyanga Christanyatjara. Munuya ngayuku kulu Godala tjapinma ngayulu tjukarurungku Godaku tjukurpa utira wangkanytjaku tjanala, panya Godaluni tjunu nyanga palumpa, kaṇa puṭu wantir'iyanı tjukurpa nyanga palunya.

### *Wiruraya Nyinama Nyuranya Anantjaku-tawara*

<sup>5</sup> Palu Jesuku walytja wiya tjuṭangkaya tjunguringkula palyanyku nyinama tjana nyuranya anantjaku-tawara. Munuya kutjupa kutjupa wiru tjanampa palyantjikitjangku kulirampa mapalkungku tjananya ungama ngulaku paṭantja wiyangku, tjana nyuranya Jesuku walytja kulira ngurkantankunytjaku.

<sup>6</sup> Munuya tjanala wirura palyanyku wangkama. Panya alatji nyura tjanala wangkanyangkaya tjinguru nyurala tjapilku piruku wangkara utintjaku, ka palulanguru nyura uti kulinma paluru tjapinnyangka tjukarurungku wangkanytjikitjangku tjana kulira nintiringkunytjaku.

Uwa alatjiṇuṇa nyurala wangkanyi nyura kulintjaku.

*Paulalu Malpa Tjutaku Tjukurpa Iyantja*

<sup>7</sup> Palu wati nyanga ini Titjikatjalu lita nyangatja nyuralakutu ma-katinyi ngura Kalatjilakutu, munu paluru nyurala tjakultjunkuku ngananañanya, munu nganampa war̄ka uwankara ngananaña palyantja tjuta kuļu. Wati nyanga Titjikatjanya nganampa malpa wiru mulapa, kala palumpa pułkara mukuringanyi. Paluru ngayunya rawangku alpamilalpai wantinytja wiyangku, panya paluru ngali tjungu war̄karipai Mayatja Jesuku. <sup>8</sup> Kaña wati nyanga palunya maiyanı nyuralakutu, ka paluru nyurala wirkara tjakultjunkuku ngananaña palya nyinanytja, munu paluru nyuranya wangkara kuṇpulku. <sup>9</sup> Ka wati kutjupa kuļu nyurampa nguranguru panya pitjanytja palula tjungu ma-pitjanyi wati panya Antijimanya. Nyanga paluru kuļu nganampa malpa wiru, kala palumpa pułkara mukuringanyi. Ka paluru pula ma-wirkara nyurala tjakultjunkuku tjukurpa uwankara ngura nyangatjatjara.

<sup>10</sup> Ka wati ini Ari-tjakatjanya ngayula tjungu nyinanyi tjailangka, munu paluru kuļu nyuranya kulini nyurampa pukularira. Ka palu purunyntjuťu nyuranya kulini wati ini Markalu Paanapatjaku malanytju. Wati nyanga palunya panyaña nganmanytju nyurala tjakultjunu panya paluru nyurala ma-wirkankunyangka nyakulaya pukultu mantjinma. <sup>11</sup> Ka wati panya ini Tjatjuwalu kuļu nyuranya kulini. Wati nyanga paluru panya ini kutjupa Tjatjanya. Palu wati nyanga paluru tjana, Ari-tjakatjanya, Markanya, Tjatjuwanya tjana panya Jew maṇkurpa

ngayula tjungu Godaku warkaripai, Jew kutjupa tjuta wiya. Nyanga paluru tjana panya ngayula tjungu pulkara warkaripai anangu tjutangka tjana Jesuku mulamularingkula palunya mayatjanmankunytjaku. Munuya paluru tjana ngayulu tjituru-tjitururinyangka pukulmankupai ngayunya.

<sup>12</sup> Ka wati panya nyurampa nguranguru pitjangu ini Paparatjanya, paluru kulu nyuranya kulini. Paluru panya pulkara Jesuku Christaku warkaripai munu nyurampa rawangku Godala tjapini nyuranya pulkara kulira. Paluru tjapilpai nyura Godaku tjukurpa rawangku kulintjaku wantintjya wiyangku, panya paluru mukuringanyi nyura Godalu wituntjtja uwankara kulira mulamularingkunytjaku munu wangañarangku kulira palyantjaku. <sup>13</sup> Ngayulu ninti wati nyanga palumpa panya nyanga paluru nyuranya pulkara anga-kulira rawangku Godala tjapilpai munu palu purunytytu tjapilpai Godaku walytja tjutaku ngura pala ini Layatiyala pulala Ara-palitjala nyinanytja tjutaku kulu.

<sup>14</sup> Ka wati wiru kutjupa Luke-anja nganampa panya ngangkari, paluru ku lu nyuranya kulini nyurampa pukularira. Ka palu purunytytu wati ini Timatjalu nyuranya kulini.

<sup>15</sup> Kaya ma-tjakultjura Jesuku walytja tjutangka ngura nyara Layatiyala nyinanytja tjutangka panya ngayulu palunya tjananya rawangku kulini. Munu palu purunytytu matjakultjura minyma ini Nimpala tjanala kulu panya nyara palumpa wa lingkaya inmaku tjunguringkupai. <sup>16</sup> Nyura lita nyangatja

tjunguringkula nyakula kulintjatjanungku watiyala Jesuku walytja kutjupa tjutakutu ngura nyara Layatiyalakutu paluru tjana ngapartji tjunguringkula nyakula kulintjaku. Kaya lita panya ngayulu ngañmanytju tjanampa iyantjanya tjana ngapartji nyuralakutu watiyalku. Kaya lita nyara palunya mantjirampa tjunguringkula nyakula wangkara kulinma!

<sup>17</sup> Palu wanyu wangka wati panya ini Atjiputjanya rawa war karira uwankara wiyanjtaku ngañalpañtu wantinytja wiyangku, panya Mayatja Jesulu palunya ngurkantanu palumpa war karinytjaku.

<sup>18</sup> Uwa, alatjituña wangkanyi nyurala lita nyangangka. Wati kutjupangku ngayulu tjakultjunkunyangka lita nyangatja walkatjunu nyurampa, palu kuwari nyangaña marangku ngayulu alatjitulo walkatjunanyi nyanga alatji, “**Ngayulu ini Paulanya mununa nyuranya rawangku kulilpai.**” Ka walka nyanga palulanguru nyura kulilkku, “Mulapa nyangatja Paulalanguru.”

Palu ngayunyañiya kulinma nyanga tjailangka nyinanyangka munutjuya ngayuku Godala tjapimma.

Uwa, alatjituña walkatjunu. Ka Godalu nyuranya rawangku pukultjungku kanyinma.

**Tjukurpa Palya  
Portions of the Holy Bible in the Pitjantjatjara  
language of Australia**

copyright © 2019 Bible Society of Australia

Language: Pitjantjatjara

Translation by: The Pitjantjatjara Bible Translation Project, Wycliffe Bible Translators and Bible Society Australia.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-04-23

---

PDF generated using Haiola and XeLaTeX on 11 Nov 2022 from source files dated 22 Nov 2019

b29b7786-0954-5b75-82cb-3657182b63d6